



ГАЗЕТА 1931 ПО' АПРЕЛЬ ИРЫ' ЮКАД ВАТА ХАСАВАЮДИМДЕЙ ЯЛХАД НАДИБЕРҢА

СИ' ИВ ЯЛХАНА НОПОЙ' СЕРТАБИВА'

# Мэбета вадава" ила' панан' етри' мэква"!

# НЯРЪЯНА

# НЭРМ



№ 16 (5186)  
2024 по'  
апрель иры'  
20 яля

СУББОТА

Российская Федерация Ямало-Ненецкий автономный округ



Сидяңг: А. Яптик гадтавы'

**Нида**  
тидхалембаңгу

3

## Мята тер" сита мэбе"ламби"



Сидяңг: уапао.ги няд ханаваы'



Сие ниць иры' 12 яляхана Пуровской район' няна илена ты пэртыха' Пяк Енкся Ильмович няби Зоя Игрумовна җарка хэбидя ялямди' мэ"җаханзь. Пыди' самляңг ю" по" җопой недам' нёдаҗаха'. Тарця сава яляхананди' нянди' Россияна" ерв Владимир Путин лаханавысь.

Нямэхэна едэй по' нюртей" яляха"на нидо' торомдэйдонзь. Тамальҗгана Мяд' тер" пом' нэмбиць. 2023 похона «Семья Ямала» конкурсахана, «Династия года» номинацияхана ва"лөяць. Тикахад «Семья года» пирдырмахана нерняна мэць. Җадьбята Енкся Ильмович җацекеыта ня', нюта

ню" ня' Москван' җэдалёрҗась. Россияна" ервм' тамальҗгана мяканда хаҗадась.

Тандая' округна" җэвахана мэна Дмитрий Артюхов ты пэрти" мят' җэдалёрҗась. Җули" хад нумҗэеремы. Пон' җобкана илеванди' няю' снегоходм' няби самляңг ю" ёнар' есясавэй сертификатм' ми"манзь сё мэтасавэй", хынотасавэй" товы. Енкся мядондаханда тарця вади хэты: «Мякани тэвавар ёльце җарка майбцо».

Сяйманзь җамд"махадандо' лакри' хибяхав телефонувна лаханавы: «Енкся Ильмович, мунона" со"? Кремль'нядсава"нидлахана". Хэвханани Белорусь' җэвахана мэна ерв Александр Лукашенко, сидя космонавтха' Марина Ва-



силевская няби Олег Новицкий мэҗаха'. Маня" җобкана мят' терха', җацекеыт небян' сямянхат сава вади җэдарамабыва". Сензда" җада", сававна иледа". Җанихи"на

нини' җани' манэтыни'. Җопой нюнд ню космосан' тиңгутана җаном' манэ"ман' харвавахад теневадм'». Тикы мядонзэйнда хавна квадроциклм' ми"мы.

- Ямалханана" саць сава яля. Сидя җарка ерв мюсерта ненэцяңг' ненадо яляхана вадам' мэ"җаха'. Таддикахад яна" ерв җули" ненадо мядонзэйм' хамадавы. Енкся няби Зоя Пяк мяд' тер" хавна космодромам' манэ"манзь Ямална" тер" җацекеы җэдарабна" сава җэңгу, - Дмитрий Артюхов тарем' лаханавы.

Енкся Пяк җобтики мядонзэйм' ми"мы. Владимир Путин теда' харта сэр" яхадейда таяңгу.

## Районда серо ваде"мы

Ямална" җэвахана мэна Дмитрий Артюхов Тасу' ям' нерня' минрена ервам' лахана ня"мы. Виктор Югай небой по' ханзер" манзара"мида, яхананда хурка серо җадимдеван' харвавида хэты.

Тибей" хардахат ненэцие ямдаламбавам' нерня' тасламбада серҗэ ваде"мэда. Пудана самляңг похона 1031 мяд' тер" илесь' ёдо' савумдавы". Җокаюм' пелядо' 607 мяд' тер" небо' едэй мядо ня"амвы". «Небой по' мядо мимбава' серкана районва" нер-

няна мэсь, җокханда 24,6 ёнар" м<sup>2</sup> сертаваць. Тюку по' җобтики сехэрэва җани' нёдава". 2024 похона мат" илесь' харадм' миван' харвава". Няхар" юр" мяд' тер" җахат" мядодо' хаеңгу". Тикы хавна районана" тиңгэвна ю" мядм' сертаби". Тюку по' тамна 18 пяңгува"», - Виктор Югай лаханавы.

Дмитрий Артюхов җобтики вадамда мэ"мы: «Тазовский районхана, тадиккахад Ямална" җардавна етри' едэй мядо мимбыва". Илесь' ё мимбава' хавна школа", нюдяко җацекеы" мэлава",

интернат" җадиберҗа". Тазовский хардахана едэй тохолкулавам' нэңгу". Тикахана сиднет ю" җацекеы" тохолко пиртадо'. Антипаюта' няна нюдяко" җацекеы" мэлава харад җадимда. Җэдя' няна җацекеы" едэй интернатан' тюңгу". Нядаңгодаңэ «НОВАТЭК» компания тара».

Тасу' я' няна ява" лэтрамбада ненэцие, мядото' тер' ёльце нядабидо'. Хусувэйндо' ед' таславы ненэциедо' таяня". Нядавэмдо' 800 пирҗэ ваде"җадо'. 2023 поход таяняна «Поможем СВОим» фонд манзара. Манзарана" ненэця",

харто' ивнандо' манзарана", общественной организация" нядаңгу". Тарем' Алексей Яптик СПК «Тазовский» компаниян' 1,5 тонна пир" җамзам' ми"мы. Пуна җамза' банки сайнортаха" җэдаравы". Тикы хавна ты' хоба җэдабтавы".

Виктор Югай пудана вадада агропромышленной комплексыамна җэвы. Хусувэй по' хабарпада тэдо' җока. Җадьбята едэй цехм' серта тасламби". Тикахана ООО «Тазовские олени» предприятия хуркари җавар" тэнз җокавна мирдапа пяңгу. Похона 900 тонна пирм' җадимдембаван' харва".

## Едэй" няд"ма"

Тандая Ямална" ерв Дмитрий Артюхов едэйвана нэрм" тер" е"эмня надимдевы" няд"мита нямна лаханась. Панаевскан няби Пэ" ня" нэдалёрмита пуд надимде таслэйдась. Тамальгана мюсерта" ненэця" нянда вадамдо" мэ"мыць.

Теда" нямгэхэв тиртя нано вынд" тиб", мякандо" тэваван" харвани мирци" ханабаңгудо". Ѓопой", нямдэсь" яда таянба" тараңгу. Тарця тиртя нано ты" лекар" серо тасламбада", я" ний илена наво лэтрамба" да департамент нэдарамба пэръяди". Хаңгурта ненэцие хан"лана тиртя нано" транспорт" няби здравоохранение" министрстваха" ватовна тигу ни серот".

Ямална" серо минрена" ерв" нюдяко" хардахана манзарана" няхато" вадам" нэдарамбаңгу". Надьбята тиртя нано" сяха" товахад ноб" теневаңгу". Ма"ним", хусувэй хибям" пэнзь пирта", нопой", нюртейнэ нэрм" тер ханабаңгу".

Дмитрий Артюхов тарем" лаханавы: «Нэрм" тер" е"эмня мале сян няд"мам" надимдеваць. Маня" етри" яна" тер" ненэцие" илам" савумдамбива". Таславы серона" нарка таром" няндо" тэвраңгу". Ненадовна таңга мякандо" тэворта". Едэй" вад", тикахад ты" пардонха"на панта" аптечка" нобтики нянандо" ёльце тараңгу". Округханана" ты пэртява" нокка, тэва" мат" юр" ёнар" пирнэ харва. Мюсерта" нина" манзаядо" ненэся тоена. Иландо", минрена серто" нензел" нэва" е"эмня етри" нядаңгува"».

Ямальской районхана илена" 2022 похона ты тэрабава" няби янубабава" ёльцяңгана тарана вад несэймда таравам" хэтаць. Тюку по" юкад вата няхар" ва" надимда": си"ивдо" ямдаламбада" нэңгу", матадо" таславы" яха"на сертавы" нэңгу". Ямальской, Тазовской, Шурышкарской, Приуральской район" сер" тартыдо". Теда" ты пэртя" нокханда 80 вадм" мэ"на".

Панаевск" няңы вымна нэдалёроманда пуд тарем" табекы: янубабава" мальгана нядаңгодадамдо" нэрм" терхат ханабаңгу". Малё 2023 поход тарця серкана юр" пир" ненэця" таравы".

Яханана" нэрм" тер" е"эмня надимдембада" няд"ма хуркари". Тикан" хусувэхэт едэй наво нядаби". Ямална" нэвахана мэна вымна нэдалёрманда сер" мюсертахат ноб" хонаркосеты. Ханзер" илевамдо" харта сэвханата манэцетыда. Тикы" пуд намдавыда, манэ"мыда иланд" надимдемба пэръяда.

Анна Яптик" падвы

## Ты" пардон тамбаңгу"



Сидяңг. М.Яр" талтавы"

**Лимбя" ирыхына округханана" ты пэрти" ед" нули" тарана серм" надимдець. Е"эмняндо" пардон" аптечка мипавам" ваде"наць. Ханзер" ненэциена" тарана нэвэ ня"марпавандо" нямна хахаяда яля" юнм" намдаваць.**

Тарана проектан" 42 миллион есям" округва" надимдеңгу. Ханя" сянок есям" сад"мам" округна" ветеринария центр тасламбаңгуда. Мюсерта" ненэцяңг" мирципой" нопой янорэй" мипаңгудо". Аптечка" мюня ты лекарабтамба мэта", хуркари" тарана" нэвэ хоңгу". Пардон", мерё масарпа, палңыба мэта" нэвэ" таянгу". Тарем" ненэця" тыдо" хабцяңгад лэтра пиртыдо".

Хибя тарця няд"мам" ня"ма пирта:  
- ты пэрти" мяд" тер", нобнэ илена" хибяри".  
Тарцяма" ня"амва" няю" няхар" ватом" нэдабато" серо"на:

- ненэця" яна" тер нэбата тара;

- харе" тыда таяня", хусувэй тарана прививкыда, биркыда таяня";

- пыда тэхэ"на мюсерманда хавна, невхы ирината ила" саирм" нэдавандо" нямна округна" системахана пада.

Пардон" аптечкама" ня"амва" няю" падарм" пада тараңгу. Тикым" харе" падбат нод", харвобт хибяхав е"эйданд падамда, пад"махаданд яхананд, районхананд нэда ветеринария" центр" мипат тара. Тамна нямгэ нэбата тара?

- падвы падал (ханзер" падыбада нэвамда няд" манэ"лабтаңгудо");

-паспортар, илесь янд ненадумда"ма, е"эйданд хибяхав паднабата, няд" нани

паспортанда сидяңг тараңгу;

- паспорт хананд илесь янд ненадумда"ма ниб" падо", та" ёльцяңгана тэри округна" тер" нэванд нямна ненадумдавы падар" тараңгу;

-е"эйданд нани ненэця" аптечкамад ня"амбата, тикахана

на падвы падал нотариусхана ненадумдавы нэбата тара.

Падрода мал" сава нэбато" ненэцянд" ненадумда"масавэй падраком" мита". Нямгэхэвандо" янубо", нани" пырдари" падрода тыхасовна ма"лаванзь митыдо". Юкад вата самляңг яля" ямбан" аптекама" мипамдо", нивамдо" тасламбаңгудо". Сидта ханзер" хонрава" нямна ты пэртя харта тасламбаңгуда.

Ты" пардон" аптечкама" нибато" та", несэйвана падрод янгамда пиртыд. Сававна ма"ла"махаданд нани" янорэй" падрод тэвра пиртыд.

Тарця птечка ёнаркад вата мяд" тер" ня"маңгу".

## Пэхэрэй тэвола"

**Тюку илаңгана пэхэрэй" лаха" тэврамбадаң хая". Неросыда яхана нули" сава няд"ма. Коранд панап" нод", пыя" ныл" тэвравы пя" тарем" нод" ни" ват".**

Теда" Тазовской районхана пэхэрэй вымна тэвола пэяд". Тет по" тыхана тикы манзаямдо" сидя ян" тярнадонзь. Лимбя" ирыхыд, ты" ниць иры" нэсонд" Ноя" вынд" пя тэвола". Таяня" имня мер" хаснэ хан"манда е"эмня тэворць нидо" пирас". Таяня пэхэрэйдо" ю" таславы яхана хаебидо".

Небо" Ноя" няю" пидо" имня тэврэйдонзь, тюку по" сыра" нимня тэврамбидо". Сыра" 1400 кубм" я" ниня хаеңгу", тамна 600 кубм" та" тэвраңгудо". Таяня илена" ненэцяңга"на нокханда сидя ёнар" кубометр пя тарасеты. Тикы" хавна Белье яры, Танам" няю" пили" сыра"

тэврамбасетыдо". Теда" нод" нани" таяня" тэвана". Нэдя", Паюте" вымна мюсерти нидо" юрыбю".

Тасу" яв" няна ноккоюм" пито" пелям" та" имня тэврамбасетыдо". Теда" малё Сэхэрэяв" няю" нани" пэхэрэй тэвравыдонзь.



Сидяңг. М.Яр" талтавы"

Марина Яр" падвы"

# Нида тидхалембангу

**Сие" ниць иры' юдимдей яляхана «Ямал-ню"на" я!» Ассоциация' илебей ненэцие" организация' тер" нобт' ма"люрцаць, пыдо' едэй нермс пэртядамдо' тэрабиць.**

Нюрте"э' Виктория Окоэтто лаханась. Пыда ты" ниць иры 2022 поход нуданданадандо' тарась. По" ямбан' минревы" серода ваде"нась. Тохолкова' ёльцяңгана хусувэй хибя общественной манзаям' минре нида пирас". Виктория манзаямда сававна пирдаледа. Вадада сяхаринда мин"нась. Тоенана серм' минренаханда жока тарана ңамгэм' тохоловы. Нида етри' нядабавыда, сяхаңгарт пуны' нивы ңа".

Пуданда «Ямал-ню"на" я!» Ассоциациям' ня"амбада Эдуард Яунгад вадамда хэтась. Мале сян тохолкодам' ненадумдась. Таддикахавахад хусувэй тэраңго пирта нуданданаңэ хэсь пир"надась. Алина Окоэтто харта пыхыдамда нерня' мэсь. Лаптандер Ялянем' няби Яптик Юлиям' тикахана мэвы" нерня' мэњахаюдонзь. Пуна харто' пыхыдато' нямна лаханаць. Ңадимдеван' харвана серодо' хэтаць.

## ЃОБАНЗЕР" ҢЭВА СИДДО' МЭБЕ"ЛАМБИ

- Новой Портхана вадыдамзь, таяна ңод" школам' ёльцедамзь. Юкад вата ңопой классам' мале"мяхадани Санкт-Петербурган' тохолкованзь хаядамзь. Тедалахана тохолкудм', юрист' манзаям' тохоломбидм'. 2018 похона ассоциацияхад паңгдэда землячеством' ходамзь. Тамальңгэхэт таяна' ядэрць пэйваць. 2021 похона мале председателъэ си"ми тэраць. Теда' ңобтики илебей ненэцие ңобт' ма"ламбаван', нядабаван' харвадм', - Алина тарем' мась.

Нянда пуд Яляне Лаптандер лахана пэяць:  
- Колледжхана нябимдей по' тохолкурнадм'.



Сидяңг: А. Яптик' тэдгавы"



Ңацеки тохоломбдаңэ хэванзь тасламбив. Саяңгардахана соядамзь, Белоярск хардахана хасава ю" классам' ёльцедамзь. Си"ми нерня' мэсь ңоб" нидамзь тоса", хамекохорта нидамзь хамеку". Тюкохона мэнахани едэй" ини ядэрабцо" ңадимья". Несэй серм' пыва няюни ңарка таром' тэвраңгу. Мань хибяхавм' тэри вадахана няда пирнав, тикы' тыхахав няни сабе енабта ни серос". Хусувэй ненэць' харта нерняку ңобта тара. Теда' тохолкоди" е"эмня сямян ңамгэм' сертаби". Ңадьбята ханяңы" ңацеки" хамэдэдарин' торомбэй". Нерняны иландо' нямна ибедорп"нандо' ңани' сава ңэңгусь.

Няхаюта пуд Панаевск' тер Юлия Яптик вахалъяць:

- Си"ми нуданданаңэ мэван' харвавара" сейхани лимбикавна теба. Ини мале пон' ядэро"махад тарем' таслав: тедари' тарця серм' минреван' харвабцоми яңгова' сер' ңа.

Няхар" няхандо' инзеле"махадандо' нись таклю" тэраңго пэйдаць. Ңокаюм' пелядо' Яляне' ед' нудидо' тю"у' мэйдонзь.

- Саяңгардахана ңэда" ассоциацияна" паңг" мал" ңобанзер" нидо' нядаба манзарабто' серо"на. Едэйвана тэравы нямда" нядабира", табатамбира". Яляне, нерняри' ңа", я"манар яңгоя. Табеко тарабта сеяр нёя пин', сяхаринда ңарка" няхатат хонарку", - Эдуард Хабэчевич' вадада тарцясь.

# Ңарка хардан' тэвормы"

**Ямалханана" #Путешествие89 проектм' нерня' минре". Тарця серм' округна" ңэвахана мэна ерв' ватовна тохолкова' серо тасламбада департамент ңадимдембида. Тандая' 10-11 классаха"на мэна" ңацеки" Санкт-Петербурган' хан"мыць. Ңокханда си"ив ю" ңопой ңэрм' терм' таяна' ядэлавьць.**

Пудана" по" школахана тохолкода" С.О. Макаров' нюмам' мэта морской няби речной флот' университетм', А.И.Герцен' нюмам' мэта тохолкулавам', Горный университетм' манэ"мы". Тарем' ядэро"мито' пуд ңани яляхана ханя' хэвахадандо' теневаңгу". Таддикахад ңамгэхэв манзаядамдо' тэраңгу".

Тохолкулава' хардо манэсармандо' хавна «Академия талантов» центрэн хан"мы". Таяна е"эмняндо' «Озвучка», «Создание стикеров» тамна ңани" тохолкова сертавы". Едэй ңаво намдава ңацекехэ"на ёльце и' вато ңэвы.

Санкт-Петербург - ңули" невхы, паской харад. Тикан' тэваб", манэ"манда жока. Нюртей мэва март' тэвавы ңацеки ханяримна ядэлавьдо: Кунсткамеран', Россияна" еся сехэры" музейн', театран'.

Ңарка сайнорма ңэва' мальңгана яна" ханяримна ненэця" тэтнаць. Тамальңгы" похо"на Ленинградм' саю" мардавараин' харвавэдонзь. Марад' тер" ңопой ныхым' мэць тарця маям' пирдалевэдонзь. Поңганандо' тодо" тэнз" ненэця", хуркари' я" тер" мэвьць. Мяк' турта ңацекехэ" тикым' ваде"мыць. Сиддо' «Пискаревское мемориальное кладбище» мемориалан' хан"лавьць.

Саць пон' таяна ниб"нандо' ңод" мы", намдавэдо' няби манэ"мэдо' тянё ни ңа". Тарана проектам' округна" тохолкова институт сертавада. Санкт-Петербургахана округна" серо нерня' минрена" нядаңговь". «Ямал-ню"на" я!» Ассоциацияхад перена" ңобтики нидо' нядабавы".

# Сававна манзара"

**Тандая' Екатеринбург хардахана «Уралспас» марафон ңась. Маянд' еремы ненэцие нядабаданэ тарана" таяна' ма"люрцаць. Поңганандо' Ямална" тер" ңани' мэць. Ноябрьскхана няби Саяңгардахана манзарана" пирдырмэць. Саяңгардахад Данил Яр няби Матвей Лаптандер ядэрнаханзь.**

- Няна" яңга ненадумдавы ё" координат тамбиць, ңокханда самляңг ю" матаць. Тикы пюбна" тарась. Хо"махадана" пыхыдана" тадтамбиваць, тикарихина манзаява" сертавэңэ толысь. Хусувэй «точка» харта нянда таславы баллда таянась. Лабтахана, яха' вархана ңэбта баллда ңокаркась. Пэдара' помна ядэрнаваць. Юкад вата хасава ю" час" ямбан' ядри' малтабна"

серо"нась. Мани' сидярининзь. Мале пон' ядэрнанинзь. Сава сер' ибась, яда сырасись. Яхако" таянаць, пи нярхалабининзь, нимняндо' яда маторпининзь. Ңопой пюрта ями халмеро" хэвхана ңэвысь. Пэвдяхана нивынинзь манэс". Писавэй-ялясавэй ядэртахани' выдаракарканинзь, мэн харбилюнинзь, ңэни' са"нець. Тамна ңани" нини" тарем' пэдара' помна ядэртахандо' яңгумы ненэциам' ховыць, ёхобормы ненэця' ңэвысь. Нюртей ян' Саяңгарад' тер няхаюни' ха"мыхынзь. Пыди' ёльце торомбэхэ' ңэвэхэ'. Мани' няхаромдэй ян' ха"мыни', - Данил пирдырма' нямна тарем' лахана.

Си"ив яля' пирт' ехэрана яхана тохолкурмы". Ңэвто' мю' пэмы" теневабцудо' пуна манзаяханандо' ңули" тараңгу".



Сидяңг: dggz\_уапао нид ханавы"

# Илебтеңгода ненэць,



Сидяңг.: В. Езыңги-җедабтавы

Сие ниць иры’ 20 яля – Россия’ тиңгэвна саць ненадо яля. Тарем’ җод” хусувэй ненэця’ ехэрада. Луца вадавна «День донора» нубе”җа.

Җамгэ’ е”эмня тикы ялям’ тарем’ нюмде таславэдо? Ѓыхы 1832 похона Санкт-Петербург-хана җарка лекар”, Андрей Вольф, вэямда ё”мы нем’ нядавы. Вэсаконда вэяхана савум-давэда (вэямда пухуцянда вэя’ паңг’ сер’ җедабтавэда, тарем’ не нивы яңгув”). Лекар” иңута саву”мэдо’. Тад нерня’ җока хаңгурта ненэця”м’ нядавы”. 2007 похона яра иры’ 20 яля’ Госдума’ тасалковахана закон’ вато” сер’ Россия’ тиңгэвна ненадо яляҗэ таславэдо’.

Нядаңгардахана «почётной донор» нюмам’ Валерий Хатя-

кович Езыңги мэ”җа. Хаңгурта ненэцие” е”эмня вэямда нида сый”.

- Сяха’ вэямд хаңгурта” не-нэцие” е”эмня мипа пясар?

- Ѓокханда мале юкад вата хасава ю” по” ямбан’ вэями мипив. 2005 похона тенева на няни пухуця лекар” мякана мэсь. Не нюк-цянда сояванда мальҗана җока вэям’ ё”җась. Е”эмнанда лекар” мят’ хаядамзъ. Манэ”махадандо’ вэями саваҗэ таславэдо’. Таминдо’ хаңгурта не’ вэяҗэ ханадо’. Тикы’ пуд си”ми хонра”, ма”ним”: «Етри’ вэямд тамбавы җэбат сава җэңгусъ. Тарця” нядаңгода” ёльце тара”». Тарем’ «донорҗэ» хаядм’. Тамальҗана соявы не җацекеця теда’ мале 19 пода. Нядаңгардахана колледжана тохолкурҗа. Тадри’ садик-хана манзаранаҗэ тараңгу.

җопой мэва’ лекар” мят’ вэ-ями миманзъ хэсетыдм’. Ханяҗэхэна лакри’ тараванда мальҗана си”ми харто’ ханзеты”, лаханасеты”. Ѓобаңгуна ты пэрти” яля’ пуд җопой мядонда лекар” мят’ еремы. Җедалёванда сер’ хан’ җылна хаёвы, пыхы-дамда маядавы. Җока вэямда ё”мы. Пыда е”эмнанда вэями миҗадамзъ.

- Тарана сер” е”эмня есям’ салдамбасеты”?

- Мань си”ни то”олха” нядаңгода” есям’ ня”амсеты”. Теда’ вэям’ җопой мэва мип”, 1553 рубльм’ салдаңгу”. Лекар” мят’ хэванд мальҗана манзаяхаданд тикы яля’ җэвадэ пиртан. Мякананд ныланаңгун. Мань тамна «Почётной донор» ненадумда”мами тая. Тарця падарм’ ня”амвы” ненэця”

җока хаңгуртам’ нядавы”. Закон’ ватовна тет юкад вата яңорэй вэямда ми”мы ненэцяли ненадо нюмдамда ня”маңгу.

- Сит тотрев’ җани’ вэямдо’ мипван харвана” җамгэм’ те-невабто’ тара?

- Сяхари’ хибяхав сава иңут’ ха”амбата, нерде’ лекар” мят’ ханда. Таяна таслаңгудо’: вэя-да сава җедакы, вэва җедакы, сенз җэвамда җани’ манэта”. Тикари-хина вэямда мипа пирта.

- Тарця серкана мэвар ихинанд хурка?

- Тарем’ нядаңговами җули” саву”җав. Хаңгурта ненэця’ харта вэямдамда таванда ненэцяндамда пюрманзъ вуни ядэрт”. Җадьбьята җани’ нядаңгован’ харвабата”, пуны’ нёда” җа”. Вэямдо’ мипада” – ненэцие илебтембада” то”олха”.

Таҗок по’ ямбан’ сян вэям’ мимақы, сян ненэця”м’ нядавакы, тюку яля’ Валерий Хатякович’ е”эмня сава вади мэ”җава”. Сензан җа”, мят тер” хэвхананд мэя”, җэвакуто’ ни’ ёмзяли’ тэсяя.

Г. Окоэтто’ падвы

## Вэнеко’ таром’ мэнедо’

Ты пэрти хасава хубта-хана нимда сярэбабта вэнекоцяда хэвхананда җоб’ тарем’ җэсоҗода вэнта, тэвам-да вадаҗэ сюртеңгу, хавода мэйраңгу, мандараха җэңгу: «Мань хамедыдм’». Ерванда пин’ тарпава’ сер’, җани’ хэ-вувнанда сакадаңгу, я”амна” сырта, тэдамда пюрта. Ерванда ханяри’ ялап”, еңган’ ни хаюрт”. Таяңы яханата, тэхэ” тэв”махад, җуда’ манзхана вэнекор тёркосавэй пулэй”. Сава танырць’ хой’ илаңгана мирта - ты.

Хада’ сея’ пахаңгана’ вэн” соявы”, няхар” - париденя, җоб” - нярьяна. Сидя вэно” небя, сидя хора вэн. Пухуця нись сянакурць сидя не’ тэңз вэнм’ вандако’ хармыкана я’ ед’ пили” талвэдаҗахаюда. Си-

дя хора’ вэнм’ ту’ морюкохана нибти”җахаюда, париденя - Налто, нярьяна - Пуру.



Сидяңг.: М. Окоэтто’-җедабтавы

Налто - пасана, Пуру - немам’ мэ”җа. Җоб” иры’ пеляхана Хутю небянди’ лыдымда җамаха”.

Нарэй хаеракохона сидя вэн’ хани пин’ тарпьяха’. Пухуця җавка яхадей’ нюм’ - тай сэр” суюм’ пыди’ манэ”җаха’, ябтако тёрхана җасиле” пяди’. Тёр” мунд’ җеда нюракута, җэва сэр” җацекеы, ярёда пивана сырако’ нимня памгабтырць то. Ханерцяда җацекеы, ханерцяда сую, тадтикахад ханерцяда вэнеко” нито’ пыя’ мал тинарьядо’. Хуна мальҗана вадэ”махадандо’ харе” тарабцудо’ пыдо’ мэ”мандидо’.

Луца вада’ харахана тарем’ манзеты”: «Тарцяни юңго җудасядарахадм’». Тикаханандо’ ма”ним”: «Саць тарана җавэсипой” манзара я”мадо’». Ёнар” ты җэбта, ю” ты җэбта, то-холавдавэй вэнекосипой” мят’ нид танаңгу”. Вэнеко’ таром’ хой’ няна саць мэнедо’.

Макар Окоэтто’ падвы

# Соля"ма' ялява"

Сие ниць иры' 19 яляхана округханана" маня" «Няръяна Ѓэर्म» газетаханана" манзаранаңэ соля"ма' ялява" ядабтамбива". Тальцюна Ямална" тиңгивна юне минренаңэ манзарани" хэбидя яляңэ серта тасладонзь. Сяни" по" ямбан' газетаханана" паднана" пыдара" е"эмнянда" етри' варемдо' мэцеты". Сяхаринда сидта" ханярина хомбасетыва". Нюрте"э' џамгэ' мянубна газетана" иле"мям' тензетехэва".

Ѓавна Совет' ила' мальңгана 1931 похона Ямалханана" нердена газета џадимьясь. «Няръяна Ѓэर्म» нубе"џась. Мале сян по" хэ"мяхад «Красный Север» хаясь. Маня" ненэй ненэцяңэ газетава" нердевы. Ѓока по" ямбан' «Няръяна Ѓэर्मхана» ненадо ненэця" паднаць. Иван Истомина, Иван Юганпелик, Леонид Лапцуй - пыдо' џэर्म' терхат нердена паднана" ненэцяңэ толы". Маня" недамдо' нэдава". Ненэй ненэця" журналист" џокадо' газетаханана" манзаравы". «Няръяна Ѓэर्म» џока ненэцям' нядась, тидхалесь.

Пудана по" џани' саць варева" мэ"џава". Газетава" толабади ханярина ядабтамбина", нянана" лаханакурџа". Сидна" ханяңэхэна табедамби", џанина" мэкад илебцодо' ваде"џа".

Хабэча Хываревич хасаи иле"мямда вадецеты:

- Ѓа"и похона паңгуй ненэця' нямна паднадамзь, сидяңгасавэясь. Тад"махананда сомбой џэванда е"эмня ямамбовна сэвамда тидхалевась. Газетахана сэвда сава ненэцяндарев' џадимьясь. Мале џока по" хаяць. Ѓамгэ' пиркана хой мяканда тэвыдамзь. Няни нямна падна"махадани ёльце маямбидамзь. Хонрав: «Падвэми толасар? Сава џэса?» Няни намдортада яңгу, тадџо" нянани лаханакурмахартан нись харва". Сяйва" џа"махадана" мяд' ерв пухуцяханда ма: «Лабтэй' мюд газетар нэкалт"!» Пухуцяда мале серо тенева, џопой санэй", похот тасехэйңэ хэвы газетам' нэкалџада, вэсакохонда миџада. Мяд' ерв газетам' ня"мада, пыхыдаханда џуда' таркахана манэ"лабтамби, вэбты вабцахана ма: «Тюку хибядо"?!» «Пыдар», - мань мадм'. «Хана?! Сини то"олха? Сэвда хурка?» Тики тальняю' сяхаңгарт' газетаханана" ненэцие" сидяңгахана сядо нин' яңгамдамбасету".

Пудана по" ненэсяри' газетава" толабада" ненэця" џока"ма". Нянана" манзарана нява" Галина Кинчина тарця иле"мям' ваде"џась.

- Ѓобаңгуна Надым няна ты пэрти" сянакова' яляхана небянда ня' ядэрта нехэ ядабтадамзь. Пыди' ханяна манзаравами намд"махаданди' таминди' лахарёмди' газетана" нямна пядинзь. Ѓаркаюм' немась:

- «Няръяна Ѓэर्म» толабасетыва". Ѓопой, газетам' толабава харта мэсыта тая. Толаңгова' ёльцяңгана џамгэхэрт сит лаволамббата ни тара", тикарихина няхаромдэй яңорэй' тола"махаданд хамедаңгур". Ѓавнани школахана ненэй вадам' нивась тохоламбою", џадьбята толаңгова тоена. Ихиня паднавара" џули" сава, маня" ненэй ненэцяңэ вадина" хэтыр" помнана" яңга", џадьбята падвы вадар сидна" џобт' пэрџа". Нина" падаркана хамедамбина". Падар" ни' тэвравы вада" џани саць тара".

Ѓани' џобаңгуна редакцияхана ёльце пирцяка"я илебей ненэця" тю. Сидя юкад вата пода џэраха. Ма"нив, газетахана ням-



Сидяңг. Л. Вануйто' тавы

нямна падна етри' пирцетыда. Пудана по" газетава" џока ненэцяңг" тэворџа. Тикы е"эмня нюдяко џэсы"мана џэдалёрџава", ненэцие лаханако ня"џава". Тарем' тасла", Сёяха' тер" џули" невхы лаханако харвобтавыдо'. Нина" е"эмня хусувэй си"ив яляхана ярабц, хынабц џадимдембива". Тарця ватом' хасаваюр" по' тяхад џарка ирихатана" минрева". Пэ' тер" сидяңго манэ"сармам' мэне".

Хусувэнда е"эмня маня" «Няръяна Ѓэर्म» газетахана паднанаңэ хусувэй си"ив яляхана варева" мэ"џава".

М. Яр' падвы



Сидяңг. М.Яр' талтавы

## Дорогие друзья!

Поздравляю коллективы ямальских средств массовой информации с профессиональным праздником!

Вы всегда в центре всех событий, происходящих на Ямале. Информируете, анализируете, освещаете самые важные темы и события региона. Благодаря вашему ежедневному, кропотливому труду о нашем регионе знают далеко за его пределами.

Доверие аудитории для журналиста - главный критерий оценки его работы. Ваши материалы всегда находят отклик у ямальцев, приносят вам признание и благодарность общества. Безусловно, заслуженные награды говорят о вашем профессионализме, ответственности и преданности профессии. Уверен, вы обязательно сохраните достигнутое и будете стремиться к новым рубежам развития!

Пусть каждый ваш выпуск, эфир, публикация становятся настоящим событием для читателей, зрителей и слушателей. Пусть в вашем плодотворном труде всегда будет место новым победам и достойным результатам! Желаю вам дальнейших успехов, интересных проектов и вдохновения!

Губернатор  
Ямало-Ненецкого  
автономного округа  
Д.А. Артюхов

## Дорогие друзья!

Ветераны и работники средств массовой информации Ямала!

От всей души поздравляю вас с профессиональным праздником – Днём ямальских СМИ!

Журналистика – это не просто профессия. Это стиль, смысл и образ жизни.

История ямальской журналистики началась 93 года назад, когда вышел первый выпуск окружной газеты «Нарьяна Нгэर्म» (Красный Север). Сегодня СМИ Ямала – это огромное сообщество профессионалов: корреспондентов, операторов, монтажеров, звукорежиссеров, дизайнеров и верстальщиков. Ежедневно они оперативно и честно рассказывают о стратегических проектах и законодательных инициативах, о событиях, происходящих в мире и на соседней улице, знаменитостях и соседях по лестничной площадке.

Особые слова признательности ветеранам – легендам ямальских СМИ, которые стали свидетелями начала эпохи становления автономного округа и заложили фундамент региональной журналистики. Теперь это дело продолжает новое поколение молодых специалистов – таких же энергичных, талантливых, с нестандартным мышлением и уникальным авторским стилем.

Желаю творческих успехов, высоких рейтингов, ярких и интересных проектов, реализации новых замыслов!

Председатель Законодательного  
Собрания  
Ямало-Ненецкого  
автономного округа  
С.М. Ямкин

ЛЕСНОЙ  
ДИАЛЕКТ

# Вадны тоҗа – нум дюпямты

Чуки дилиң шевимты дяляхана вахандя капи» «Вадның дялям» мэшту». «Вадны тоҗа – нума дюпа няң шатхалтай» - таям понантоң маньштомай». Вахандя капи» дилвсохона ваднэ - кайвюча халаку. Вандхана чики халако нум кяхя' ни җаймай, җашкиуди», ни» лэпёта. Таям чуки дилихина вахандя» вадның дялям мэшту».

Кайвюча халакуң Җэлм' дян тэвма дюнь дятнлаш, чики дяляхана нятуң мят мячидёльш кяшту», каңулдонташту», кайвюча халоконтун маймаң мэты. Вадның дяляхана җашкиуде» майпё пя» помна дяляң мид тоода пёшку няньтатуң пюльшту». Кимя җука нянь җомтаңа - чике дилта, вяпта пон хома җайты, таям шиниңкуна маньштомай». Вадның пичат җашкиуде шелташту», поңкнатуң ша-накошту», кукинтун нюңк' җаймам, мэмямам' конулпёш мянальшту». Чуки ноптухуна җупчики тальша вадның дялям шанат калтыхина мэшту».

Талкахана вадны дялям дё-льше хомана мэҗатоньш. Чики мероприяитим' шанат тэмс нешади» культуран дет тондюта центрхана мансланна» шелтаҗатоньш. Вадның дяляң томы» хынилмаң, дюньшидемаң мэты вильта праздник мэҗаш». Вахандя капиди» вандмана шелтамайтуң вадның деэмня җайта сценкам' җычимчеҗаш», шанат тэмс нешади» ватамана кынуҗаш», талаҗаш». Чики праздникхана мэна» нетуң таамна дяляң мидас тоолха нянь -кэляш» миҗаш». Вадның дяляхана җука конкурс» шелтаҗаш. Чуки похона чикитоң чупей' мят' чел' дет тунды».

Праздникан томы» неҗи» җашкиуде» җупум чеңкапёш мянальш», поляну» пайпёш нэхэмтуң конулпиш». Чикиң камна кимя мед тум' чудимаң маньсалыш», тань-дет җайта конкурсхана хятмайтуң паныдөтуң җычимчимпиш». Паныдю» конкурсхана җашкиуди» поңкат җайвахай местам Ксе-



## ВОРНГА ХАТАЛЬ

ния Суздальцева канаңа, пыта панымта жюри пи́ди патмыңэ тонла. Җалка мяналта» нешади» поңкна Елена Родямова җайвахай местан камай. Елена Семёновна шиниңкуй дилым' ништута дюл, вахандя капиди» культурам пон җалтана» җашкехеэ» вачапштута. Җашкиуде» праздникан томантуң нельня немянатуң няш вадның мидас шелтамай» – кукинтун вадны пи́ди хома, чике» мячись» няамҗаш».

Вадның дяляхана мяналды» ни», җашкиуди» җупчики тотун мячись» няамҗаш». Чикиң камна праздникхана мэмы» җашки» нюңк'җаймамтуң, мэмямамтуң нэхэдүмпёш, вядкудольш конулпиш». «Северный очаг» нимита паркхана мансланна» кулкади» шанаку» җычимчеҗаш». Вадның дяляхана шанкмян тэмс неша» җопт

җомаш». Праздникхана мэна» хомана ньптакуш», майпёш кулкади» конкурсхана» поңкнатуң мянальш».

Евгения Зернова чики праздникан путахана тошту», маньшту, шиниңкуна петадахана дилина ненэй неша» җупчики тальша дялятоң таяҗаймай. Евгения Шотлевна маньшту, җыди понанта та'дя чедипата җалка пуша» манаҗа: нита» җупухана мэмы посама» куйкуң пахант камтсоҗата», вадны җайта чикен дютамаң мэт, няньудитата таньняң мышчеҗата. Җалка неша» шиниңкуй шеду» хомана чедидятуң, таньдөльшкэй дилым җашкехеэ вачамантуң мэт путахана тальша праздникхи» тошту».

Лариса Айваседо патмы



Вадның дялям шелтамы центрхана мансланна» маньшту», җалтана» җашкиуди» хынилмаң мэт шиниңкуй шеду», дилм җычимчештутун. Вахандя капи» дилхана тальша: нельчеэ́й томы вадны дялям пян җамтап - нум мед ни' дюпямт, ламту пян җампатамел таңичумты.

**Ту' хадакоця**

Ту' хадакоця,  
Сит саву"цадм',  
Хэвкохонанд  
Хынондарицадм'.

Ту' хадакоця,  
Нён вэнзакабтю",  
Ту' хадакоця,  
Нюд лэтрамбю".

Явокохонандэй  
Нюдэй вадабанэй",  
Туңэй хадакоця,  
Нюдэй юдабанэй".

Няңэй, сава няңэй,  
Ѓарка мятэй' мюнёв  
Пыдар тукоцярэй,  
Турэй нёя хабтёв".

**Сыра' сэв**

Сыра' сэвкоця  
Ѓули" сибёцяко,  
Нохо' таргаревэй  
Тэри ливартаңов.

Хадэй, хадэй  
Хасеркадэй",  
Мерцёв, мерцёв  
Хонаркадэй",  
Маней, маней  
Тараңадэйм',  
Маней, маней  
Хыноңадэйм'.

Сыра' сэвкоця  
Мядэй сюрелеңов,  
Тараванда серэй  
Хадэй масабтаңов.

Си"ив ямб ялёв  
Хадэй ладыбидов,  
Вэңгалана ңудов  
Ѓудов ниңэй ңадёв".

**Хубтакохона**

Хэй! Хэй! Хэй! Хэй!  
Хаерако юркадэй"  
Мядонов ялэмдов",  
Сиднов высылпёв".



Хувы юркыканов  
Ярколариңавов",  
Сыра' хоей" нимнёв  
Ѓэдалёртаңавов".

Хэй! Хэй! Хэй! Хэй!  
Ѓарка хоей" ниңэй  
Яля тарпотаңов.  
Тына" сюраңанёв".

Тюку сава ялёв  
Маня" маямбиров".  
Сава нинэй мятэй  
Ѓэдалариңугов".

Хэй! Хэй! Хэй! Хэй!  
Ѓэдалахавамов",  
Яля' сэвэй ңылэй  
Хэңгадахавамов".

**Нара**

Нум' ёрхана  
Хаер" сюра  
Падуха"на лимбяка,  
Сякна ядемби.  
Вы' яна" нара  
Тет' падвы  
Хабто подермы.  
Вы' ямда пэңа,  
Сяни тэңз паны,  
Нара сэдвы.  
Сыра холкана,  
Ид" ензорта".  
Вы' яна" нара,  
Саць ңатенава"  
Ѓэдалё турңа.  
Нум' сармикэця"  
Я' ханедако"

Сяни муно"мана  
Сялкабтырңанё".  
Вы' яна" нара  
Тет' падвы"  
Меретако" тыда  
Тыда подерңанё.

**Тадебцо**

Си"ив нув' нися,  
Ѓарка нисякова"!  
Си"ив Нув' небя,  
Ѓарка небякова"!  
Нуво танте"э  
Пяна ңэб"нани  
Вэва нюкцянди'  
Нядаңгодакэри.

Варк' яха' лаңг',  
Пирця' лаңг' ний,  
Ѓоб" еся' мяни,  
Еся' мяни' мюна,  
Парнэ мирбацями  
Серхавабани,  
Си"ив тёндеретам'  
Ня"амхавабани.


Еся тота нюня  
Сярнакосавэй,  
Симзыкони' ни'  
Ѓамдхавабата,  
Нум' сармикэця",  
Я' сармикэця",  
Хэхэ' мядо" мюд  
Вади тэволаңов".

Нум' ню нидм' ңа",  
Я' ню нидм' ңа".  
Тадебя нидм' ңа"  
Юдэрта нидм' ңа".  
Нуво" тяхад  
Нумгы" тяхад  
Табедавы недм'  
Ѓэдабтавы недм'.

**Ты пэрти"  
хэбидя яля**

Ты пэрти" яляхана  
Си"ив я' тер"  
Тасу' яв' сэрт'  
Ѓобт' ма"люрңа".  
Хибя мэбета,  
Хибя мерета,  
Пирдырта".  
Ва"лэй хасава"  
Ныхыдырта".  
Мэбета сюдбя"  
Пирдырта".  
Хэбидя ялян'  
Мадавы паны,  
Паны серыби",  
Пибидо' серыби".  
Тасу' яв' сэрт"  
Ѓэдалёртахад  
Талбэй сыра  
Халда хате.  
Хэбидя ялява"  
Маня" мэнеңава".  
Ѓэрм' яханана"  
Илебядёңава".

**Надежда Салиндер'  
падвы"**



Сидянт: М. Яр' падвы

# Сава юнхат сёнзями хыно”җа

Тюку по’ Харута нэсыхына ты пэртя” хэбидя ялямдо’ хэвы ирий’ няхар” юдимдей толыркана мэ”манзь тасламбидонзь. Валакада җарка яханана” вэвако сер” хадкэй”, җока хибяри” янгумаць. Җадьбянда ты пэрти” җарка ялям’ Харутахана нерняна тованда ирий’ сибимдей яляхана мэ”җадонзь.

Тюку си”ив нябимдей яляхана СПК «Рассвет Севера» правление мале ваерась. Таняна ерводо’ тарем’ тасладонзь: «Хусувэй по’ җарка ялямдо’ сие ниць ирий’ сибимдей толыркана мэтадо’».

Харутахана нюртей тарця җарка ныланавадо’ 2019 по’ ты” саполана ирийхана нэвы. Тамальнгананенэця” хойхадтоць, помнандо’ пирдырҗаць, тэхэна нэдалёрҗаць, хано санарпиць, ярколаць, сюрберҗаць. Хыноти, тарани маниець, мирдаңгуртахат таранадамдо’ тэмдабиць. Тарем’ мале самляңг по’ ямбан’ «Нэर्म ялумд» ныланава’ ялямдо’ мэцеты”.

Тикы’ нерцюна «Рассвет Севера» колхозхана серодо’ тоенаць, ты пэртя” маяндорць илець. 2018 похона колхозхана манзарана”



Җарка я’ юн

едэй җуданданадамдо’ тэраць. По’ ваерась серодо’ тю”у’ минзь пядонзь. Җацембой ервотадо’ Алёна Басманова пявы манзаяхананда вырама манэ”лабта. Тамальнганана ханзер” нерня’ нэвамдо’ хойхад товы” нэнэцяңгана тасламбидась. Нидо’ нядаба янамбовна җобкана нерняри’ миҗа”. Самляңг по’ ваерась, серодо’ тидхалэйдаць. Җэто’ ни’ нульяд”, есьдо’ җадимя”, недбидо’ ёльцяңгананя”марпидо’. Тюку ялян’ җатэбидо’ яңгу”, манзаяханандо’ таранадамдо’ тэмдаба есьдо’ тэворҗа”. Алёна Басманова предприятий мэвна

- Самляңг по” тяхана яни’ тер” си”ми ервҗэ тэраць, серона” җобкана тасламбина”. Тюку ирийхана сянакова’ яляхана по’ ямбан’ манзаравина” таславаць. Пова” савась, манзаява” тидхалысь. Ненэциена” илаңгато’ ивьер’ сырҗа”, тяхасовна тыдо’ мание”, сава вадина” няндо’ тэврэйна” Няби яляхана җарка

ялява” мэ”манзь ма”лываць, хусувэй нэсыхыт нэнэця” турҗаць, мядондина” танияць. Харута’ хибяри” паңгодо’ хойхад пере”, пыдо’ нисянадо’ «Рассвет Севера» колхозхана манзараць, - тарця вади СПК нерм’ пэртя хэтась.

Тикы’ хавна округна” еркы маркад мядонди җатець. Нэсыхына илена” артист” программандо’ хамадамбиць, хойхад мел” не” паской, падтавы паныдо’, пибидо’ мэць турҗаць. Мел”мана сэдвы ембдядоро’ манэ”лабтаць, нюдо’ нянандо’ турҗаць, пыдо’ ваднандо’ тэхэ”на мэванда җэ”ним”.

Паскойвана ембадэда мюсерта нэнэцие мание харад’ тер” маямби”! Нидо’ ядабтась перенито’ няю’ лаханоро”мидо’ тянө” ниць җа”, хусувэй хибяри сава юнхат сёнзядя хыно”җась.

Юлия Талеева’ падвы



Смляңг. Ю. Талеева’ гадтавы

Харута’ тер” «Нэर्म ялумд» нюбета ялям’ җатедонзь. Теда’ хойхана мюсерта” нод” тев’ ёльцяңгана сян’ ныланава ялякодо’ тания. Пыдо’ җарка ялямдо’ мэ”манзь җани’ турҗаць.

Леонид  
Васильевич  
Лапшуй’ падвы”  
иңудота” вади”  
хара толахава”.  
Ненэцие  
сава серк”  
табедамби”.  
Е”эмнана” Елена  
Григорьевна  
Сусой  
книга’ терҗэ  
ма”лавыда.



## Иңудота” вади” хара”

Сава няриданд  
Толабада няр,  
Сёнзянда мюриевна  
Ванебтөб”нанда —  
Сэхэкутхад  
Тамна вэва җэңгу,  
Ниня тосанан’  
Сит тобе”лаңгу.

\* \* \*

Нямд хамзавамд,  
Нямд мэневамд  
Сёнзя’ мюд җэда,  
Сейхад миндя  
Вади” нядабад —  
Тамальнганана  
Вада пойриңгу  
Нянд ирихина.

\* \* \*

Җокам’ манэсо”ма,  
Җокам’ намдоро”ма  
Ненэця’ им’  
Җарамдамбаҗада,  
Ненэця’ им’  
Латамдамбаҗада.

\* \* \*

Саць җока серм’  
Теневаб”нанд,  
Ила’ сапрадо’  
Хамэдамбаңгуд.

\* \* \*

Ехэрана җамгэм’  
Тохолаб”нанд,  
Мэбертадрев’  
Хандариңан.

\* \* \*

Таняна и’ ну”  
Теневабцохона  
Харта нядабада.  
Теневабцохона  
Ниб”нянд няда”,  
Таняна и’ ну”  
Сит ни няда”.

Газета  
«Няръяна Нэर्म»

Главный редактор  
Яр Марина  
Тэтакучевна

ГЕНЕРАЛЬНЫЙ ДИРЕКТОР  
АНО «Ямал-Медиа»  
Зулинова Мария Андреевна

№ 16 Подписано в печать 18.04.2024 г.  
Вышла в свет 20.04.2024 г.  
По графику: 16.00, фактически: 16.00.

ПОДПИСНЫЕ ИНДЕКСЫ:  
на год – ПА701,  
на полугодие – ПР562.

Учредитель – департамент внутренней политики ЯНАО  
(629008, ЯНАО, г. Салехард, пр-кт Молодёжи, д.9, каб.708).

Издатель – департамент внутренней политики ЯНАО (629008, ЯНАО,  
г. Салехард, пр-кт Молодёжи, д.9, каб.708)

Газета зарегистрирована – Управлением Федеральной службы по надзору в сфере  
связи, информационных технологий и массовых коммуникаций по Тюменской  
области, ХМАО-Югре и ЯНАО от 19 апреля 2012 года.  
Регистрационный ПИ № ТУ72 – 00559

Тираж 3616 экз.

Заказ № 0575 (тираж 1581 экз.) отпечатан в АНО «Ямал-Медиа»  
Юридический адрес: 629003, Ямало-Ненецкий автономный округ,  
г. Салехард, мкр. Богдана Кнунянца, д.1, каб. 106  
Фактический адрес: 629007, Ямало-Ненецкий автономный округ,  
г. Салехард, ул. Чубынина, 39А

Заказ № 0575/1 (тираж 2035 экз.) отпечатан в АНО «Ямал-Медиа»  
629309, ЯНАО, г.Новый Уренгой, ул. Северное кольцо, стр. 2/4).  
Газета выходит по субботам.

Цена годовой подписки 166 руб. 84 коп.

В розницу не распространяется.

Адрес редакции: 629003, ЯНАО,  
г. Салехард, мкр. Богдана Кнунянца,  
д.1, каб. 106  
тел. (349 22) 4-53-32

E-mail: nn@yamal-media.ru